



Datë:
Numër Protokolli:

08.05.2025
3224/2025

A.nr.421/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave, në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj-Demi, anëtar, me Ylber Fetahaj, në cilësinë e procesmbajtësit, në procedurë sipas ankesës A.nr.421/2025 të datës 05.03.2025, të parashtruar nga ankuesi, J.G., kundër organit të punësimit/Ministritë së Shëndetësisë, në çështjen juridike “Kompensim material”, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datën 08.05.2024, mori këtë:

V E N D I M

Hedhet poshtë si e palejuar ankesa A.nr.421/2025 e datës 05.03.2025, e parashtruar nga ankuesi, J.G.

A r s y e t i m

Nëpunësi civil, J.G (në tekstin e mëtejme referuar: Ankuesi), i punësuar në Komunën e Kamenicës, më datë 05.03.2025 ka parashtruar ankesë me numër protokolli 1458/2025 të regjistruar nën shenjë A.nr.421/2025 në Këshillin e Pavarur Mbikëqyrës për Shërbimin Civil të Kosovës, lidhur me kompensimin e shtesës për vëllimin e punës.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) duke ju referuar shkresave të lëndës të parashtruar nga palët në procedurë ka gjetur se ankesa e parashtruar nga ankuesi me datë 05.03.2025 është e palejuar, sepse:

Nga provat e lëndës rezulton se ankuesi sipas Akt emërimit me shifër Nr.Pro. 05-10017 të datës 23.12.2024, është i punësuar në Ministrinë e Shëndetësisë, dhe se i njëjti mbanë pozitën e punës “Drejtor i Departamentit për Administratë dhe Shërbime të Përgjithshme”.

Më datë 05.03.2025 ankuesi ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor për kompensimin material për funksione shtese pasi që i njëjti ishte në cilësinë e Kryesuesit të Komisionit për Provim Profesional shëndetësor që kane diplomuar ne Fakultetin e Stomatologjisë duke kërkuar që te aprovohet ankesa si e bazuar dhe te obligohet Ministria e Shëndetësisë që te ankuesit në cilësinë e Kryesuesit te Komisionit për provim profesional për profesionistët shëndetësor ne lëmin e Stomatologjisë të me kompensojnë shumen ne

masën prej 30% të pagës baze të zyrtarit kryesor administrativ duke u mbështet në rregulloren QRK Nr.10/2023 për kompensime dhe funksione shtese

Kolegji për Shqyrtimin dhe Vendosjen e Ankesave lidhur me pranueshmerinë e ankesës iu referua dispozitave të Ligjit Nr.08/L-197 për Zyrtarët Publikë, përkatësisht nenit 27 paragrafi 3 ku përcaktohet se: 3. Nëpunësi civil ka të drejtë të paraqes ankesë në Këshillin e Pavarur Mbikëqyrës të Shërbimit Civil të Kosovës për çdo veprim apo mosveprim, që i cenon të drejtat apo interesat e ligjshme, të drejta këto që burojnë nga marrëdhënia e punës në shërbimin civil, si dhe dispozitat e Ligjit Nr.05/L-031 për Procedurën e Përgjithshme Administrative, përkatësisht neni 124 ku përcaktohet se: 1. Pala ka të drejtë të ushtrojë mjetet juridike administrative ndaj çdo veprimi apo mosveprimi administrativ, nëse pretendon se të drejtat apo interesat e saj juridike cenohen nga ky veprim apo mosveprim, dhe si rrjedhojë referuar dispozitave përkatëse ligjore konstatoi se nëpunësi civil ka të drejtë të paraqes ankesë në Këshillin e Pavarur Mbikëqyrës për Shërbimin Civil të Kosovës, për çdo veprim apo mosveprim, që i cenon të drejtat apo interesat e ligjshme të cilat burojnë nga marrëdhënia e punës, mirëpo kur kemi të bëjmë me realizimin e të drejtave sikurse në rrethanat e rastit konkret për kompensimin material për funksione shtesën, nëpunësi civil fillimisht duhet t'i drejtohet organit të punësimit me kërkesë për realizimin e të drejtës se pretenduar, dhe vetëm kundër aktit për refuzimin e kërkesës apo heshtjes së organit publikë në raport me kërkesën e parashtruar, mund të parashtroj ankesë, sipas afateve të përcaktuara me dispozitat e nenit 127 të Ligjit Nr.05/L-031 për Procedurën e Përgjithshme Administrative.

Kolegji i Këshillit, bazuar në kudrin përkatës ligjor si dhe nga shqyrtimi dhe analizimi i shkresave të lëndës, gjegjësisht përgjigjes në ankesë të organit të punësimit, ka konstatuar se ankuesi për realizimin e kompensimit material për shtesën e vëllimit të punës, për çka edhe ka parashtruar ankesë, nuk i është drejtuar paraprakisht me kërkesë organit të punësimit, gjegjësisht Njësisë për Menaxhimin e Burimeve Njerëzore në Ministria e Shëndetësisë, veprim ky i domosdoshëm për iniciimin e procedurës administrative sipas dispozitave të ligjit përkatës për Procedurën e Përgjithshme Administrative. Si rrjedhojë, në mungesë të kërkesës së parashtruar të organi të punësimit për realizimin e të drejtës së pretenduar, nga ankuesi, në rastin konkret nuk kemi objekt trajtimi ngase mungon veprimi apo mosveprim nga organi i punësimit në raport me të drejtën e pretenduar në ankesë, për çka ankuesi mund të kontestonte ligjshmërinë e veprimit të organit të punësimit, apo mosveprimin e tij.

Kështu që, për sa me sipër dhe duke marr parasysh faktin se ankuesi nuk ka parashtruar kërkesë të organi përkatës i punësimit për realizimin e kompensimit material për shtesën e vëllimit të punës, Kolegji konstaton se në rrethanat e rastit konkret nuk janë plotësuar kushtet ligjore për pranueshmerinë e ankesës në kuptim të nenit 129 paragrafi 1 nën paragrafi 1.4 ndërlidhur me nenin 125 paragrafi 1 të Ligjit Nr.05/L-031 për Procedurën e Përgjithshme Administrative, dhe se duke u mbështetur në dispozitat e nenit 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi që të hedhë poshtë ankesën si të palejueshme, siç është përcaktuar në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Iniciimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.421/2025

Ylber Fetahaj

Procesmbajtës

Malsore Gashi Bajraktari

Kryetare e Kolegjit

Vendimi i dorëzohet:

- Ankuesit, J.G;
- Udhëheqësit të Njesisë së Burimeve Njerëzore në Ministrinë e Shëndetësisë; dhe
- Arkivit të KPMSHCK-së.